

宋史

冊
套

蘇
父

宋史卷三百八十四

元中書右丞相總裁脫脫等修

列傳第一百四十三

陳康伯

梁克家

汪澈

葉義問

蔣芾

葉顥

葉衡

陳康伯字長卿信之弋陽人父亨仲提舉江東常平康伯幼有學行宣和三年中上舍丙科累遷太學正丁內艱貴溪盜將及其鄉康伯起義丁逆擊俘其渠魁邑得全建炎末爲勅令刪定官預脩紹興勅令尋通判衢州攝郡事盜發白馬原康伯督州兵濟王師進討克之除太常博士改提舉江東常平茶鹽高宗進蹕建康康伯以職事過闕得對因請擇將上開納紹興八年除樞密院大計議官累遷戶部司勳郎中康伯與秦檜太學有舊檜當國康伯在郎省五年泊然無求不偷合十三年始遷軍器監借吏部尙書使金至汴將晡不供餉閉戶臥勿問入夜館人扣戶謝不敏亦不對後因金使至詔康伯館伴端午賜扇帕

與論拜受禮言者以生事論罷知泉州海盜間作朝廷遣劉寶成閔逐捕康伯
以上意招懷盜多出降籍爲兵久之不逞者陰倡亂康伯訊得實論殺之州以
無事秩滿三奉祠垂十年檜死起知漢州將出峽召對除吏部侍郎康伯首請
節用寬民凡州縣取民無藝許監司互察臺諫彈劾尋兼禮戶部乞約歲用會
所入儲什之一二備水旱奏上議竟不決兼刑部前此有司希檜意興大獄康
伯平讞直冤士大夫存歿多賴之除吏部尙書宰臣擬用權尙書出命高宗顧
曰朕且大用何權爲尋拜參知政事自孫道夫使北還已聞金以買馬非約爲
言朝廷特特和康伯與同知樞密院事王綸白發其端綸使還乃言和好無他
康伯持初論不變九月以通政大夫守尙書右僕射同中書門下平章事例賜
銀絹康伯固辭減半又辭兼史院上嘗謂其靜重明敏一語不妄發真宰相也
又命與湯思退輔政事勿憚商論惟其當而已康伯言大臣事當盡公若依阿
植黨此鄙夫患失者臣非惟不敢亦素不能高宗嘆其長者普安郡王居潛藩
高宗一日謂康伯當以使相封真王今宜冠以屬籍於是詔以爲皇子封建王

實三十年二月也明年三月拜光祿大夫尚書左僕射五月金遣使賀天申節
出嫚言求淮漢地指取將相大臣且以淵聖凶問至康伯主禮部侍郎黃中之
論持斬衰三年先是葉義問賀允中使還言金必敗盟康伯請早爲之備建四
策一增劉錡荆南軍以重上流二分畫兩淮地命諸將結民社各保其境三劉
實獨當淮東將驕卒少不可倚四沿江諸郡脩城積糧以固內地至是召三衙
帥及楊存中至都堂議舉兵又請侍從臺諫集議康伯傳上旨曰今日更不問
和與守直問戰當如何時上意雅欲視師內侍省都知張去爲陰沮用兵且陳
退避策中外妄傳幸聞蜀人情洶洶右相朱倬無一語同知樞密院事周麟之
受命聘金憚不欲行康伯獨以爲己任奏曰金敵敗盟天人共憤今日之事有
進無退聖意堅決則將士之意自倍願分三衙禁旅助襄漢待其先發應之康
伯勉周麟之以國事麟之語侵康伯康伯曰使某不爲宰相當自行大臣與國
存亡雖死安避麟之竟以辭行罷尋貶責殿中侍御史陳俊卿言當用張浚且
乞斬張去爲以作士氣康伯以俊卿振職奏權兵部侍郎九月金犯廬州王權

敗歸中外震駭朝臣有遣家豫避者康伯獨具舟迎家入浙且下令臨安諸城門扃鑰率遲常時人恃以安敵迫江上召楊存中至內殿議之因命就康伯議康伯延之入解衣置酒上聞之已自寬翌日入奏曰聞有勸陛下幸越趨閩者審爾大事去矣盍靜以待之一日忽降手詔如敵未退散百官康伯焚之而後奏曰百官散主勢孤矣上意既堅請下詔親征以葉義問督江淮軍虞允文參謀軍事上初命朱倬爲都督倬辭乃命義問允文尋敗敵於采石金主亮爲其臣下所斃而還方亮之犯江國人卽立葛王褒三十二年始遣高忠建來告登位議授書禮康伯以誼折之於是報書始用敵國禮高宗倦勤有與子意康伯密贊大議乞先正名俾天下咸知聖意遂草立太子詔以進及行內禪禮以康伯奉冊孝宗卽位命兼樞密使進封信國公禮遇殊渥但呼丞相而不名康伯自建康扈從回卽以病祈去位不允明年改元隆興請益堅遂以太保觀文殿大學士福國公判信州上慰勞甚勤且曰有宣召慎勿辭宰執卽府錢別百官班送都門外已又辭郡丐外祠除醴泉觀使二年八月起判紹興府且令赴闕

奏事復辭未幾召陪郊祀時北兵再犯淮甸人情驚駭皆望康伯復相上出手札遣使卽家居召之未出里門拜尙書左僕射同中書平章事兼樞密使進封魯國公親故謂康伯實病宜辭康伯曰不然吾大臣也今國家危當與疾就道幸上哀而歸之爾道聞邊遽兼程以進至闕下詔子安節壻文好謙掖以見減拜賜坐間日一會朝許肩輿至殿門仍給扶非大事不署敵師退尋以目疾免朝謁臥家旬餘一奏事乾道元年正月上辛有事南郊康伯起陪祠已卽丐歸章屢上不許一日出殿門喘劇輿至第薨年六十有九贈太師諡文恭擇日臨奠子偉節固辭乃止命工部侍郎何備護喪歸二子偉節除直祕閣安節賜同進士出身五辭不受上手札批諭寄留省中以成其美康伯薨給還之慶元初配享孝宗廟庭改諡文正

梁克家字叔子泉州晉江人幼聰敏絕人書過目成誦紹興三十年廷試第一授平江簽判時金主亮死衆皆言可乘機進取克家移書陳俊卿謂敵雖退吾兵力未振不量力而動將有後悔俊卿歸以白丞相陳康伯歎其遠慮召爲祕

書省正字遷著作佐郎時災異數見克家奏宜下詔求言從之令侍從臺諫卿監郎官館職疏闕失克家條六事一正心術二立紀綱三救風俗四謹威柄五定廟算六結人心其論定廟算謂今邊議不過三說曰將兵財語甚切直累遷中書舍人使金金以中朝進士第一敬待之卽館宴射連數十發中的金人來賀慶會節克家請令金使入朝由南門百官由北門從者毋輒至殿門外以肅朝儀詔定爲令郊祀有雷震之變克家復條六事遷給事中凡三年遇事不可必執奏無隱嘗奏陛下欲用實才不喜空言空言固無益然以空言爲懲則諫爭之路遂塞願有以開導之上欣納因命條具風俗之弊克家列四條曰欺罔苟且循默奔競上手筆獎諭乾道五年二月拜端明殿學士簽書樞密院事明年參知政事又明年兼知院事初修金好金索所獲俘啓釁未已克家請築楚州城環舟師于外邊賴以安在政府與虞允文可否相濟不苟同皇太子初立克家請選置官屬增講讀員遂以王十朋陳良翰爲詹事中外稱得人允文主恢復朝臣多迎合克家密諫數不合力丐去上曰兵終不可用乎克家奏用兵

以財用爲先今用度不足何以集事上改容曰朕將思之詰朝上面諭曰朕終夜思卿言至當毋庸去八年詔更定僕射爲左右丞相拜克家爲右丞相兼樞密使一日上謂宰執曰近過德壽宮太上頤養愈勝天顏悅懌朕退不勝喜克家奏堯未得舜以爲己憂旣得舜固宜甚樂允文奏堯獨高五帝之壽以此上曰然允文旣罷相克家獨秉政雖近戚權倖不少假借而外濟以和張說入樞府公議不與寢命俄復用說怒士夫不附己謀中傷之克家悉力調護善類賴之議金使朝見授書儀時欲移文對境以正其禮克家議不合遂求去以觀文殿大學士知建康府陞辭上以治效爲問克家勸上無求奇功旣而三省密院卒移牒泗州敵不從遣泛使來舉朝震駭後二年湯邦彥坐使事貶天下益服克家謀國之忠淳熙八年起知福州在鎮有治績趙雄奏欲令再任降旨仍知福州召除醴泉觀使九年九月拜右丞相封儀國公逾月而疾十三年命以內祠兼侍讀賜第在所存問不絕十四年六月薨年六十手書遺奏上爲之垂涕贈少師諡文靖初唱第時孝宗由建邸入侍愛其風度峻整及登政府眷寵尤

渥爲文渾厚明白自成一家辭命尤溫雅多行于世

汪澈字明遠自新安徙居饒州浮梁第進士教授衡州沅州用万俟卨薦爲祕書正字校書郎輪對乞令帥臣監司待從臺諫各舉將帥高宗善之行其言除監察御史進殿中侍御史特賜鞍馬時和戎歲久邊防浸弛澈陳養民養兵自治豫備之說累數千言顯仁皇后攢宮訖役議者欲廣四隅土庶墳在二十里內皆當遷命澈按視還奏昭慈徽宗顯肅懿節四陵舊占百步已數十年今日何爲是紛紛漢長樂未央宮夾櫟里疾墓未嘗遷國朝宮陵儀制在封堠界內不許開故合祔願遷出者聽其意深矣高宗大悟悉如舊葉義問使金還頗知犯邊謀澈言不素備事至倉卒靖康之變可鑑今將驕卒情宜加蒐閱使有鬪心文武職事務選實才不限資格除侍御史左相湯思退不協人望澈同殿中侍御史陳俊卿劾罷又論鎮江大將劉寶十罪詔奪節予祠三十一年上元前一夕風雷雨雪交作澈言春秋魯隱公時大雷震電繼以雨雪孔子以八日之間再有大變謹而書之今一夕間二異交至此陰盛之證殆爲金人今荆襄

無統督江海之備禦因陳修攘十二事殿帥楊存中久握兵權內結闥寺王十朋陳俊卿等繼論其罪高宗欲存護使去澈與俊卿同具奏存中始罷會金使高景山來求釁端澈言天下之勢彊弱無定形在吾所以用之陛下屈己和戎厚遺金繒彼輒出惡言以撼吾國願陛下赫然睿斷益兵嚴備布告中外將見上下一心其氣百倍矣除御史中丞尋遣馬帥成閔以所部三萬人屯京襄以澈爲湖北京西宣諭使詔凡吏能否民利病悉以聞過九江王炎見澈論邊事辟爲屬偕至襄陽撫諸軍鄂帥田師中老而怯立奏易之時欲置襄守荆南澈奏襄陽地重爲荆楚門戶不可棄敵將劉萼擁衆十萬揚聲欲取荆南又欲分軍自光黃擣武昌朝廷以敵昔由此入江南令吳拱嚴護武昌津渡拱將引兵回鄂澈聞之馳書止拱而自發鄂之餘兵戍黃州俾拱留襄敵騎奄至樊城拱大戰漢水上敵衆敗走時唐鄧陳蔡汝潁相次歸職方未幾金主亮死澈乞出兵淮甸與荆襄軍夾擊其歸師未報而金新主罷兵請和召澈入爲參知政事與宰相陳康伯同贊內禪孝宗卽位銳意恢復首用張浚使江淮澈以參豫督

軍荆襄將分道進討趙搏守唐王宣守鄧招皇甫偁於蔡襄漢沃壤荆棘彌望
澈請因古長渠築堰募閒民汰冗卒雜耕爲度三十八屯給種與牛授廬舍歲
可登穀七十餘萬斛民償種私其餘官以錢市之功緒略就隆興元年入奏還
武昌而張浚剋期大舉詔澈出師應之澈以議不合乞令浚併領荆襄諫議大
夫王大寶論澈無制勝策皇甫偁以忠義結山砦扼敵要衝澈不能節制坐視
孤軍墮敵計趙搏以千五百人救方城敗散五百餘人澈漫不加省乞罷黜澈
亦請祠除資政殿學士提舉洞霄宮大寶疏再上落職仍祠祿明年知建康府
尋除樞密使在位二年以觀文殿學士奉洞霄祠尋知鄂州兼安撫使孝宗訪
邊事澈奏向者我有唐鄧爲藩籬又皇甫偁控扼陳蔡敵不敢窺襄旣失兩郡
偁復內徙敵屯新野相距百里爾臣令趙搏王宣築城儲糧分備要害有以待
敵至於機會之來難以豫料孝宗善之時議廢江州軍澈言不可知寧國府改
福州福建安撫使復請祠尋致仕卒年六十三贈金紫光祿大夫諡莊敏澈爲
殿中日薦陳俊卿王十朋陳之茂爲臺官高宗曰名士也次第用之矣在樞府

孝宗密訪人材薦百有十八人常奏言臣起寒遠所以報國惟無私不欺爾其自奉清約雖貴猶布衣時有文集二十卷奏議十二卷

葉義問字審言嚴州壽昌人建炎初登進士第調臨安府司理參軍范宗尹爲相義問與沈長卿等疏其姦爲饒州教授攝郡歲旱以便宜發常平米振民提刑黃敦書劾之詔勿問前樞密徐俯門僧犯罪義問繩以法俯嘗舉義問怒甚乃袖薦書還之知江寧縣召秦檜所親役同僚不可義問曰釋是則何以服他人卒役之通判江州豫章守張宗元忤檜或中以飛語事下漕臣張常先宗元道九江常先檄義問拘其舟義問投檄曰吾寧得罪不爲不祥常先白檜罷去檜死湯思退薦之上記其嘗言范宗尹召至言臺諫廢置在人主檜親黨宜盡罷逐以言得罪者宜敘復擢殿中侍御史樞密湯鵬舉效檜所爲植其黨周方崇李庚置籍臺諫鉏異己者義問累章劾鵬舉有一檜死一檜生之語并方崇等皆罷之又言凡擇將遇一闕令樞密院具三名取上旨則軍政盡出掌握遷侍御史朱樸沈虛中奉祠里居義問劾其附秦檜皆移居郊祀赦義問言頃歲

附會告訐者不應例移放從之遷吏部侍郎兼史館修撰尋兼侍讀拜同知樞密院事上聞金有犯邊意遣義問奉使覘之還奏彼造舟船備器械其用心必有所在宜屯駐沿海要害備之金主亮果南侵命視師義問素不習軍旅會劉錡捷書至讀之至金賊又添生兵顧吏曰生兵何物耶聞者掩口至鎮江聞瓜洲官軍與敵相持大失措乃役民掘沙溝植木枝爲鹿角禦敵一夕潮生沙溝平木枝盡去會建康留守張燾遣人告急義問乃遵陸云往建康催發軍市人皆媒罵之又聞敵據瓜洲采石兵甚衆復欲還鎮江諸軍喧沸曰不可回矣回則有不測遂趨建康已而金主亮被弑師退義問還朝力請退遂罷隆興元年中丞辛次膺論義問頃護諸將幾敗事且以官私其親謫饒州乾道元年詔自便六年卒年七十三

蔣芾字子禮常州宜興人之奇曾孫紹興二十一年進士第二人孝宗卽位累遷起居郎兼直學士院時宦者梁珂事上潛邸撓權尹穡論珂與祠芾繳奏罷之簽書樞密院事首奏加意邊防又奏拔將才行伍間識其姓名一旦披籍可

立取具又料簡歸正人仍以北人將之或令深入山東或令自荆襄深入除權參知政事同知國用事芾奏方今財最費於養兵藝祖取天下不過十五萬人紹興初外有大敵內有巨寇然兵數亦不若今日之多近見陳敏勇汰三千人戚方汰四千人然多是有官人與以外任請券錢添借給如故是減於內而添於外何益又招兵耗蠹愈甚臣考覈在內諸軍每月逃亡事故常不下四百人若權停招兵一年有半俟財用稍足招丁壯不惟省費又得精兵上悟一日因進呈邊報上顧芾曰將來都督非卿不可芾奏臣未嘗經歷兵間又奏方今錢穀不足兵士不練將帥與臣不相識願陛下更審思其人南郊禮畢宰相葉顥魏杞罷芾採衆論參己見爲籌邊志上之明年拜右僕射同中書門下平章事兼樞密使會母疾卒詔起復拜左僕射芾力辭有密旨欲令歲大舉手詔廷臣議或主和或主恢復使芾決之芾奏天時人事未至拂上意服闋除觀文殿大學士知紹興府提舉洞霄宮尋以言者論落職建昌軍居住期年有旨自便再提舉洞霄宮卒芾始以言邊事結上知不十年間致相位終以不能任兵事受

責豈優於論議而劣於事功歟

葉顥字子昂興化軍僊遊人登紹興元年進士第爲廣州南海縣主簿攝尉盜發州檄巡尉同捕巡檢獲盜十餘人歸其勞於顥顥曰掠美欺君倖賞三者皆罪不忍爲也帥曾開大善之知信州貴溪縣時詔行經界郡議以上中下三等定田稅顥請分爲九等守從之令信之六邑以貴溪爲式知紹興府上虞縣凡繇役令民自推貨力甲乙不以付吏民欣然皆以實應催租各書其數與民約使自持戶租至庭親視其入咸便之帥曹泳令今歲夏租先期送什之八顥請少紓其期泳怒及麥大熟民輸租反爲諸邑最泳大喜許薦于朝顥固辭賀正中薦顥靜退遂召見顥論國讎未復中原之民日企鑾輿之返其語剴切高宗嘉納除將作監簿知處州青田令陳光獻羨餘百萬顥以所獻充所賦湯思退之兄居處州家奴屠酤犯禁一繩以法思退不悅屬常州逋緡錢四十萬守坐免移顥知常州金犯邊高宗視師建康道毗陵顥賜對舟次因言恢復莫先於將相故相張浚久謫無恙是天留以相陛下也顥初至郡無旬月儲未一年餘

緡錢二十萬或勸獻羨顥曰名羨餘非重征則橫斂是民之膏血也以利易賞心實恥之召爲尙書郎除右司詔求直言顥上疏謂陛下以手足之至親付州郡之重寄是利一人害一方也人稱其直除吏部侍郎復權尙書時七司弊事未去上疏言選部所以爲弊乃與郎官編七司條例爲一書上嘉之令刻板頒示除端明殿學士拜參知政事兼同知樞密院事武臣梁俊彥請稅沙田蘆場帝以問顥對曰沙田乃江濱地田隨沙漲而出沒不常蘆場則臣未之詳也且辛巳軍興蘆場田租並復今沙田不勝其擾上曰誠如卿言顥至中書召俊彥切責之曰汝言利求進萬一爲國生事斬汝不足以塞責俊彥皇恐汗下是日詔沙田蘆場並罷御史林安宅請兩淮行鐵錢顥力言不可安宅不能平旣入樞府乃上章攻顥云顥之子受宣州富人周良臣錢百萬得監鎮江大軍倉御史王伯庠亦論之顥乞下吏辯明乃以資政殿學士提舉洞霄宮上下其事臨安府時王炎知臨安上令炎親鞠置對無秋毫跡獄奏上以安宅伯庠風聞失實並免所居官仍貶安宅筠州召顥赴闕入見上勞之曰卿之清德自是愈光

矣除知樞密院事未拜進尙書左僕射兼樞密使顥首薦汪應辰王十朋陳良翰周操陳之茂芮曄林光朝等可備執政侍從臺諫上嘉納又言自古明君用人使賢使愚使姦使盜惟去泰甚上曰固然虞有禹臯亦有共驩周有旦奭亦有管蔡在用不用顥曰誠如聖訓但今日在朝雖未見有共驩管蔡然有竊弄威福者臣不敢隱上問爲誰顥以龍大淵對語在陳俊卿傳上以國用未裕詔宰相兼國用使參政同知國用事顥乃言今日費財養兵爲甚兵多則有冗卒虛籍無事則費財有事則不可用雖曰汰之旋即招之欲足國用當嚴於汰緩於招可也孔子曰節用而愛人蓋節用則愛人之政自行於其間若欲生財祇費民財爾上曰此至言也上曰建康劉源嘗賂近習朕欲遣王抃廉其姦顥曰臣恐廉者甚於姦者乃止乾道三年冬至上親郊而雷顥引漢故事上印綬提舉太平興國宮歸至家不疾而薨年六十八以觀文殿學士致仕贈特進諡正簡顥爲人簡易清介與物若無忤至處大事毅然不可奪友人高登嘗上書譏切時相名捕甚急顥與同邸擲令逸去登曰不爲君累乎顥曰以獲罪固所願